

PEMBERITAHUAN PERTANYAAN DEWAN RAKYAT

PERTANYAAN : LISAN

**DARIPADA : TUAN TEO KOK SEONG
[RASAH]**

TARIKH : 28 OKTOBER 2014

SOALAN :

Tuan Teo Kok Seong [Rasah] minta MENTERI PERUSAHAAN PERLADANGAN DAN KOMODITI menyatakan secara terperinci usaha Kerajaan dalam membantu pekebun getah dan kelapa sawit yang menghadapi kemerosotan harga hasil tanaman yang menjejaskan pendapatan dan kehidupan pekebun.

JAWAPAN:

Tuan Yang Di-Pertua,

Untuk makluman Ahli Yang Berhormat, Kerajaan memahami akan kesan penurunan harga getah dan sawit, terutamanya terhadap pendapatan para pekebun kecil. Dalam hal ini, Kerajaan telah mengambil beberapa langkah untuk menangani kesan kejatuhan harga kedua-dua komoditi ini ke atas pendapatan dan kehidupan pekebun kecil.

Bagi komoditi getah, Kerajaan telah memberi bantuan khas sebanyak RM500 secara *one-off* kepada pekebun kecil getah yang terjejas akibat kejatuhan harga getah pada tahun 2013 dan 2014. Ini melibatkan peruntukan sebanyak RM130 juta pada tahun 2013 dan RM150 Juta pada tahun 2014.

Lain-lain langkah yang dilaksanakan adalah seperti berikut:

- i. Menyediakan insentif tanaman semula terutamanya kepada pekebun kecil bertujuan mengurangkan bekalan dan meningkatkan produktiviti dalam jangka masa yang panjang;
- ii. Melaksanakan mekanisme penetapan harga di ladang melalui penetapan diskaun antara harga FOB dan harga diterima oleh pekebun kecil. Mekanisme ini akan dilaksanakan mulai bulan November 2014 yang mana koperasi pekebun kecil akan membeli getah daripada pekebun kecil pada harga yang

ditetapkan dan menjualnya terus kepada pengilang. Dengan berbuat demikian, rantai pemasaran antara pekebun kecil dan pengilang akan dipendekkan. Dengan itu, harga di ladang yang diterima oleh pekebun kecil akan dapat dipertingkatkan; dan

- iii. Melaksanakan Insentif Pengeluaran Getah mulai tahun 2015 dengan memperuntukkan dana awal sebanyak RM100 juta bagi membiayai insentif ini. Dalam hal ini, apabila harga SMR 20 FOB menurun ke paras RM4.60 sekilogram dan ke bawah, Kerajaan akan menyediakan insentif pengeluaran sebanyak RM0.30 sekilogram bagi cuplumps dan maksimum RM0.90 sekilogram lateks berdasarkan kepada kandungan getah kering.

Sebagai langkah antarabangsa, satu mesyuarat di kalangan ahli-ahli *Association of Natural Rubber Producing Countries (ANRPC)* telah diadakan pada 13 Oktober 2014 di Kuala Lumpur untuk membincangkan isu-isu berkaitan dengan penurunan harga getah serta mencari jalan bagaimana menangani isu ini.

Di samping itu juga, Malaysia akan terus bekerjasama dengan Thailand dan Indonesia di bawah kerangka *International Tripartite Rubber Council (ITRC)* bagi memastikan harga getah berada di paras yang menguntungkan kepada pekebun kecil. Ketiga-tiga negara ini menghasilkan hampir 64% pengeluaran dunia.

Tuan Yang Di-Pertua,

Dalam kes industri sawit, bagi membantu meningkatkan eksport, Kerajaan mulai 4 September 2014 telah pun memberikan pengecualian duti eksport ke atas minyak sawit mentah bagi tempoh September hingga Disember 2014. Selain itu, langkah-langkah berterusan yang akan dilaksanakan oleh Kerajaan adalah seperti berikut:

- i. Meningkatkan kadar adunan di bawah Program Biobahan Api dari B5 (adunan 5% biobahan api sawit dengan 95% diesel petroleum) ke B7 (adunan 7% biobahan api sawit dengan 93% diesel petroleum) mulai Januari 2015. Langkah ini akan membolehkan peningkatan penggunaan minyak sawit mentah dalam negara sehingga 500,000 tan setahun;
- ii. Menyediakan insentif tanaman semula kepada para pekebun kecil bagi menanam semula kawasan-kawasan yang tidak produktif dan mengurangkan penawaran minyak sawit dalam negara;
- iii. Meningkatkan usaha-usaha promosi produk-produk sawit di pasaran-pasaran sedia ada dan pasaran-pasaran baru; dan
- iv. Memperkukuhkan aktiviti-aktiviti penyelidikan dan pembangunan (R&D) bagi mempelbagaikan produk-produk baru berasaskan sawit.

Tuan Yang Di-Pertua,

Kementerian akan terus memantau perkembangan harga komoditi-komoditi utama negara, terutamanya getah dan sawit dan akan mengambil langkah-langkah yang sewajarnya bagi memperkukuhkan harga komoditi tersebut.

Sekian, terima kasih.